

四庫全書

子部

欽定四庫全書

子部

古今事文類聚後集卷二

詳校官中書臣康綸鈞

侍讀臣孫球覆勘

總校官

臣王燕緒

校對官中書臣趙秉淵

臣張仲芳

謄錄監生

臣張仲芳

欽定四庫全書

古今事文類聚後集卷一

宋 祝穆 撰

人倫部

宗族

同姓通譜 不肖通譜
妄認譜系 以上並附

羣書要語以親九族

注

上至高祖下至玄孫夏侯歐陽

等以為九族者父族四母族三妻族二

堯典
疏

角弓刺幽

王也不親九族骨肉相怨

雅小

葛藟王族刺平王也周室

道衰棄其九族

同上

豈無他人不如我同姓

杜林

古今事實

散金宗族

疏廣棄官歸家日令家具酒食請族人故舊賓客相與
娛樂居歲餘廣子孫竊謂廣所愛信老人曰子孫欲及
君在時頗立產業今日飲食費且盡願丈人勸說買田
宅老人以間為廣言此計廣曰吾豈老耄不念子孫哉
使賢而多財則損其志愚而多財則益其過且此金聖

主惠養老臣也宗族共享其賜盡吾餘日不亦可乎

三世共財

樊重世善農稼好殖貨三世共財上下戮力財利歲倍
貨至鉅萬外孫何氏兄弟爭財重耻之以田二頃解其

忿訟

後漢樊宏傳

北富南貧

阮咸與籍居道南諸阮居道北然北阮富而南阮貧

詳見

七夕門

百口同爨

魏楊道一家之內男女百口總服同爨庭無間言

北史

妻勸異居

劉君良四世同居隋末荒饑妻勸異居因易置庭樹鳥巢令闢且鳴妻曰天下亂禽鳥不相容況人耶君良即與兄弟異居月餘知其謀斥去妻召兄弟流涕以告復同居

同居書怨

唐張公藝九世同居高宗有事泰山臨幸其居問本末

公藝書百忍字以對

孝友傳

三世同爨

博陵崔僊總麻親三世同爨貞元以來言家法者以僊
為首生六子一登輔相五任大僚太常卿邠太府卿鄴
外臺尚書郎邠廷尉卿邠執金吾鄴左僕射平章事鄴
而邠及邠五知貢舉得七百四十人邠昆仲自貴達亦
同居光德里一宅

擊鼓會飯

裴寬兄弟八人於東都置八院相對甥姪亦有名常擊鼓會飯

犬亦共牢

江州陳氏宗族七百口每食設廣席長幼以次坐而食之有畜犬百餘亦共一牢食一犬不至諸犬為之不食

小學

計口給餉

李昉家子孫數世至二百餘口猶同居共爨田園邸舍所収及有官者俸祿皆聚之一庫計口日給餉

絹遺親族

范文正公自政府歸姑蘇焚黃搜外庫中有絹三千疋令掌吏錄親戚及閭里知舊自大及小散之皆盡曰宗族親戚見我生長幼學壯行為我助喜我何以助之哉

史危

自叙宗袞

以下係同姓通譜

謝康樂稱太傅為宗袞

與巫通譜

唐趙彥昭遷中書侍郎同平章事以權倖進中宗時有巫趙挾鬼道出入禁掖彥昭以姑事之其得宰相巫力也

尊為父兄

李義府已貴乃言系出趙郡與諸李叙昭穆嗜進者往往尊為父兄給事中李崇引與同譜既謫普州巫削去

呼為叔父

羅威賦詠甚有情致錢塘人羅隱有詩名威遣使賂遺

自叙宗姪呼為叔父

六帖

同譜復合

會稽黃渥與庭堅皆出於婺州之黃田七世以上失其

譜以年相望與渥相近復以兄弟合宗

山谷作黃育字序

不許通譜

以下條不肯通譜

杜正倫求與城南諸杜同譜不許銜之諸杜所居號杜

固其地有旺氣故世衣冠正倫既執政建言鑿杜固通水以利人川流如血閱十日止自是南杜不振

不妄認祖

狄青為樞密使有狄梁公之後持梁公畫像及告身十餘軸詣青獻之以謂青之遠祖青謝之曰一時遭際安敢自附梁公厚贈而還之比之郭崇韜哭子儀之墓所得多矣

筆談

遙遙華胄

以下係妄認譜系

梁何昌寓為吏部尚書有姓閔求官者昌寓問君是誰
後答曰子騫後昌寓掩口笑曰遥遥華胄

認郭汾陽

五代唐郭崇韜為樞密使用事自宰相豆盧革等皆附
之以其姓郭因問崇韜曰汾陽王本太原人徙華陰公
家世鴈門豈其枝派耶崇韜曰因遭亂亡失譜牒嘗聞
先人言上距汾陽四世耳革曰然則固從祖也

通譜方相

唐有士人姓方好矜門第但姓方貴人必認為親戚或戲之曰豐邑方相何親遽曰再從伯氏戲者笑曰既是方相姪只堪嚇鬼蓋豐邑坊乃造凶器出賣之地

妄認遠祖

有一故相遠派在姑蘇因嬉遊書其壁曰大丞相再從姪某嘗遊至此有士人李璋素好訕謔題其傍曰混元皇帝三十七代孫李璋繼至

筆談

古今文集

雜著

族譜引

蘇明允

蘇氏族譜譜蘇氏之族也蘇氏出於高陽而蔓延於天下唐神堯初長史味道刺眉州卒于官一子留於眉之有蘇氏自此始而譜不及者親盡也親盡則曷為不及譜為親作也凡子得書而孫不得書者何也以著代也自吾之父以至吾之高祖仕不仕娶某氏享年幾某日卒皆書而他不書者何也詳吾之所自出也自吾之

父以至吾之高祖皆曰諱某而他則遂名之何也尊吾之所自出也譜為蘇氏作而獨吾之所自出得詳與尊何也譜吾作也嗚呼觀吾之譜者孝弟之心可以油然而生矣情見於親親見於服始於縗而至於緦麻而至於無服無服則親盡親盡則情盡情盡則喜不慶憂不弔喜不慶憂不弔則塗人也吾所與相視如塗人者其初兄弟也兄弟其初一人之身也悲夫一人之身分而至於塗人吾譜之所以作也其意曰分於塗人者勢也

勢吾無如之何也幸其未至於塗人也使其無至於忽
忘可也嗚呼觀吾之譜者孝弟之心可以油然而生矣系
之以詩曰

吾父之子 今為吾兄 吾疾在身 兄呻不寧
數世之後 不知何人 後死而生 不為戚欣
兄弟之情 如足於手 其能幾何 彼不相能
彼獨何心

蘇氏族譜亭記

蘇明允

匹夫而化鄉人者吾聞其語矣國有君邑有大夫而爭訟者訴於其門鄉有庠里有學而學道者赴於其家鄉人有為不善於室者父兄輒相與恐曰吾夫子無乃聞之嗚呼彼獨何修而得此哉意者其積之有本末而施之有次第耶今吾族人猶有服者不過百人而歲時蜡社不能相與盡其懽欣愛洽稍遠者至不相往來是無以告吾鄉黨隣里也乃作蘇氏族譜之亭於高祖墓塋之西南而刻石焉既而告之曰凡在此者死必赴冠娶

必告少而孤則老者字之貧而無歸則富者收之而不
然者族人之所共誚責也歲正月相與拜奠於墓下既
奠列坐於亭其老者顧少者而嘆曰是不及見鄉隣風
俗之美矣自吾少時見有為不義者則衆相與疾之如
見怪物焉慄焉而不寧其後少衰也猶相與笑之今也
則相與安之耳是起於某人也夫某人者是鄉之望人
也而大亂吾俗焉是故其誘人也速其為害也深自斯
人之逐其兄之遺子而不卹也而骨肉之恩薄自斯人

之多取其先人之貲田而欺其諸孤子也而孝弟之行
缺自斯人之為其諸子所訟也而禮義之節廢自斯人
之以妾加其妻也而嫡庶之別混自斯人之篤於聲色
而父子離處謹誨不嚴也而閨門之政亂自斯人之黷
財無厭惟富者之為賢也而廉耻之路塞此六行者吾
時所謂大慙而不容者也今無知之人皆曰某人何人
也猶且為之其輿馬赫奕婢妾靚麗以欺罔君子是州
里之大盜也吾不敢以告鄉人而私以戒族人也彷彿

於斯人之一節者願無過吾門也予聞之懼而請書焉
老者曰書其事而缺其姓名使他人觀之則不知其為
誰而夫人之觀之則面熱內慙汗出而食不下也且無
彰之庶其有悔乎予曰然乃記之

義田記

錢公輔

范文正蘇人也平生好施予擇其親而貧疎而賢者咸
施之方貴顯時置負郭常稔之田千畝號曰義田以養
濟群族之人日有食歲有衣嫁娶凶葬皆有贍擇族之

長而賢者主其計而時其出納焉日食人一升歲衣人一練嫁女者五十千再嫁者三十千娶婦者三十千再娶者十五千葬者如再嫁之數葬幼者十千族之聚者九十口歲入給稻八百斛以其所入給其所聚沛然有餘而無窮仕而家居俟代者與焉仕而居官者罷其給此其大較也初公之未貴顯也嘗有志於是矣而力未逮者二十年既而為西帥及參大政於是始有祿賜之入而終其志公既沒後世子孫修其業承其志如公之

存也公雖位充祿厚而貧終其身歿之日身無以為殮
子無以為喪惟以施貧活族之義遺其子而已昔晏平
仲敝車羸馬桓子曰是隱君之賜也晏子曰自臣之貴
父之族無不乘車者母之族無不足於衣食者妻之族
無凍餒者齊國之士待臣而舉火者三百餘人如此其
為隱君之賜乎彰君之賜乎于是齊侯以晏子之觴而
觴桓子予嘗愛晏子好仁齊侯知賢而桓子服義也又
愛晏子之仁有等級而言有次第也先父族次母族次

妻族而後及其踈遠之賢孟子曰親親而仁民仁民而愛物晏子為近之今觀文正之義田賢於平仲其規模遠舉又疑過之嗚呼世之都三公位享萬鍾祿其邸第之雄車輿之飾聲色之多妻孥之富止乎一已而已而族之人不得其門而入者豈少哉況於施賢乎其下為卿為大夫為士廩稍之充奉養之厚止乎一已而已而族之人操壺瓢為溝中瘠者又豈少哉況於他人乎是皆公之罪人也公之忠義滿朝廷事業滿邊隅功名滿天下

後必有史官書之者予可略也獨高其義因書以遺於世云

劉氏義學記

朱元晦

始予守南康隣境德安有宰焉為政一本儒術甚以惠愛得其民歲饑為請蠲租而州家不可顧民狼狽相驚有逃去者則亟使人追止之曰所不為若等力請于州必蠲十七者令寧委印綬去終不忍使若等為異鄉鬼也民聞是令下為之感泣復相與攜而歸衆乃具以情

白州若部刺史竟得如約乃已予聞而竊心善之而問其邑里姓名則曰玉山劉侯也南康屬邑有越德安而懸隸者每遣掾吏循行則必戒使謁劉侯觀其荒政所施以為法於是劉侯之惠不止行其封內而又波及南康之境竟食斯民得無流亡殍死者及予將終更乃得納謁劉氏之館而拜賜焉則望其貌聽其言而有以信其為君子人也後數歲予以事過玉山則劉侯以待次家居復得相見如平生歡一日慨然語予曰吾家本單

貧而入仕又甚晚顧無以仁其三族者間嘗割田立屋
聘知名之士以教族子弟而鄉人之願學者亦許造焉
兄弟之間有樂以其貲來助者而吾猶懼其或不繼也
則又出新安餘俸為之發舉居積以佐其費而凡所以
完葺丘隴周卹族姻者亦取具焉既已言於吾州而邦
君吳侯樂聞之為之出教刻符以詔吾之子孫使毋違
吾志吾子雅知我其為我記之以告其教學於此者使
知有以勉焉予聞而歎曰今士大夫或徒步至三公然

一日得志則高臺深池撞鐘舞女所以自樂其身者惟恐日之不足雖廩有餘粟府有餘錢能無為州里災害則足矣固未暇以及人也如劉侯者身雖寵而官未登於六品家雖溫而產未能千金顧其所以用心乃如此是則可謂賢遠於人而亦可以見其前日德安之政不為無本而匪以聲音笑貌為之矣乃追本其事而記之如此雖然古人之所謂學者豈讀書為文以干利祿而求溫飽之云哉亦曰明理以修身使其推之可以及夫

天下國家而已矣群居於此者試以此意求諸六經孔
孟之言而深思力行之庶其有以不負劉侯之教也劉
侯名允迪字德華云

義莊記

陸務觀

東陽進士陳君德高因吾友人呂君友德來告曰德高
不幸早失先人舉進士又輒斥念昔先人進德高輩於
學蓋將使之事君使之字民以廣我先人之志顧雖自
力而不合於有司之繩尺其如遂負所期望付託生何

面以奉祭享死何辭以見吾親於地下不獲於仕進為時雨為豐年矣獨不可退而施於宗族乎於是欲為義莊畧用范文正公之架度而稍增損之以適時變敢求文於執事者且載其事於碑予復之曰美哉吾子之志也人之情於其宗族遠則踈之彌遠則益踈而至於忘之蓋以身為親踈而不以先人為親踈也視兄之子已或不若已之子已之子與兄之子自吾父視之有異乎能以父之心為心則已之子與兄之子且不知其同異

矣推而上之大父之孫為從父兄弟曾大父之曾孫為從祖兄弟又推而上之至於無服雖天下長者不能無親疎之殺矣於乎制服不得不若是也若推上世之心愛其子孫欲使之衣食給足婚嫁以時欲使之為士而不欲使之流為工商降為皂隸去為浮圖老子之徒則一也死而有知豈以遠而忘之哉義莊之設蓋基於是然舉天下之能為是者有幾非以為不美而不為也力不足也若陳君者自其先人勤勞節約以致饒餘而陳

君不敢私有之其地在滕頭昭福寺之旁初期以千畝
今及十之七而吾地在滕頭者止此比隣感其義皆欲
期年間貿易以成之又植桑畜牛築堤以豐衣食之源
其詳見碑陰又有最當慮者吾子之心則盡矣後人或
貪而專利或嗇而吝出或夸而廣費或挾長挾仕挾有
力之助而敗約非有司者別白之則莊且壞不支府牧
邑長丞掾曹吏及鄉之鄉大夫先生處士其必網維主
張之使久而如一日陳氏布衣也其貲產非能絕出一

鄉之上而義倡於鄉如此吾徒仕於朝宦于四方雖未必皆厚祿然聞陳氏之風不知愧且慕者豈人情也哉于是併書以遺焉君之先君子蓋諱士澄字彥清云

時當會族

謝昌國

凡人家法須令每有族人遠來則為一會以會族雖無事亦當一月為之古人有花樹韋家宗會法可取也然族人每有吉凶嫁娶之類亦須更相為禮使骨肉之意常相近骨肉日疎者只為不相見情不相接也

善勸錄

古詩

命子

陶潛

悠悠我祖爰自陶唐邈為虞賓世歷重光御龍勤夏承
韋翼商穆穆司徒厥族以昌紛紜戰國漠漠衰周鳳隱
於林幽人在丘逸虬遶雲奔鯨駭流天下有漢眷余愍
侯謂陶舍見功臣表於赫愍侯運當攀龍撫劍風邁顯茲武功

書誓山河啓土開封疊疊丞相謂陶青見功臣表允迪前蹤渾

渾長源鬱鬱洪柯群川載導衆條載羅時有語默運因

隆宥在我中葉桓桓長沙

謂陶侃

惟茲長沙伊勲伊德天

子疇我專征南國功遂辭歸臨寵不忒孰謂斯心而近

可得肅矣我祖慎終如始直方二臺惠和千里於穆仁

考淡焉虛止寄跡風雲寘茲愠喜嗟余寡陋瞻望非及

顧慚華髮負影隻立

後段見姓名門

贈長沙公族祖一首

并序

陶潛

長沙公於余為族祖同出大司馬昭穆既遠已為路人
經過潯陽臨別贈此

同源分流人易世踈慨然悟歎念茲厥初禮服遂悠歲
月渺徂感彼行路眷焉躊躇於穆令族允構斯堂詣氣
冬輝映懷圭璋爰采春花再警秋霜我曰欽哉實宗之
光伊途云邁在長志同笑言未久逝焉西東遙想湘渚
滔滔九江山川阻遠行李時通何以寫心貽茲話言進
簣雖微終在為山敬哉離人臨歧悽然歛襟或遼音問
其先

示從孫濟

杜甫

平明跨驢出未知適誰門權門多嚙啗且復尋諸孫諸
孫貧無事宅舍如荒村堂前自生竹堂後自生萱萱草
秋已死竹枝霜不繁淘米少汲水汲多井水渾刈葵莫
放手放手傷其根阿翁懶惰久覺兒行步奔所來為宗
族亦不為盤飧小人利口實薄俗難具論勿受外嫌猜
同姓古所敦

律詩

吾宗

杜甫

吾宗老孫子質朴古人風耕鑿安時論衣冠與世同在
家常早起憂國願年豐語及君臣際經書滿腹中

贈益陽成之主簿并引

黃魯直

予之竄嶺南道出衡陽見主簿君益陽黃成之問宗派
乃同四世祖兄于是出嫂氏子婦相見喟然念高祖父
之兄弟未遠也而殊鄉異井六十歲而後相識亦可悲
也益陽兄之叔父晦甫侍御在家著孝友之譽立朝有
忠鯁之名不幸年五十有四被召而沒於道上將啓手

足自力作疏極論濮園事所謂歿而不忘諫君以德其
枝葉必將豐茂有赫赫於世者故作詩道之

闕祖門中種陰德名塞四海世有人諸兒莫斷詩書種

解有無闕

縉紳

又

人間卿相何足道曾次詩書要不忘男兒邂逅起屠釣
何如林中日月長

詩話

不重宗盟

陶淵明有贈長沙公詩序云予於長沙公為族祖同出
大司馬昭穆既遠已為路人故其詩云同源分流人易
世疎感彼行路眷焉躊躇蓋深傷之也杜子美訪從孫
濟而不免於防猜故其詩云所來為宗族亦不為盤飧
小人利口實薄俗難具論勿受外嫌猜同姓古所敦觀
長沙公及濟則尊祖之義掃地矣

韻語
陽秋

姓氏

羣書要語別生分類

注

生姓也別其姓族分其類使相

從

舜典

錫土姓

注

以所生之土賜之為姓故天子建德因

生以賜姓謂有德之人生此地以此地名賜之姓以顯

之

禹貢

姓者生也以此為祖令之相生雖下及百世而此

姓不改族者屬也與其子孫共相連屬其旁支別屬則

各自為氏

左隱公疏

天子賜姓命氏諸侯命族族者氏之別

名也姓者所以統係百世使不相別也氏者所以別子

孫之所出故世本之篇言姓則在上言氏則在下也

史記

注

古今事實

帝王同姓

五帝三王自黃帝至舜禹皆同姓而異其國號以章明德故黃帝為有熊顓帝為高陽帝嚳為高辛帝堯為陶唐帝舜為有虞禹為夏后而別姓姒氏契為商姓子氏稷為周姓姬氏

史舜紀

以土為氏

炎帝之姜黃帝之姬因始所生地而為之姓

唐張說傳

舜由

媯汭故陳為媯姓

史

穆王使造父攻徐偃王破之乃賜

以趙城由此為趙氏

史

以封為氏

文王封子時叔於沈其後為沈氏

太公望本姓姜氏

封於呂故曰呂尚其後為呂氏

武王封太伯曾孫於

閭其後為閭氏

晉穆侯封少子成師於韓其後為韓

氏 晉獻公封畢萬於魏其後為魏氏

宋公子段食

於褚其後為褚氏 宋太公食於蕭其後為蕭氏 楚
賁皇食於苗其後為苗氏 晉叔向食於楊其後為楊
氏 杞之後食於婁故後為婁氏 越之後食於歐山
之陽故後為歐陽氏

以名為氏

陳伯哀之後為袁氏 齊公子高之後為高氏 衛公子惠
孫之後為孫氏 宋公子樂父之後為樂氏 宋司寇牛父
之後為牛氏 魯閔子騫之後為騫氏

以官為氏

祭仲初為祭封人守封疆者後以為氏 漢孝文時居
官者長子孫以官為氏倉氏庫氏則倉庫吏之後也

以字為氏

隱八年無駭卒羽父請謚與族公問族於衆仲衆仲答
曰天子建德因生以賜姓胙之土而命之氏諸侯以字
為氏因以為族官有世功則有官族邑亦如之公命以
字為展氏

以物為姓

伯陽生於李樹下遂指李樹為姓 馬援其先趙奢為
趙將能馭馬號馬服君後之子孫因以為氏 第五倫
其先諸田徙園陵多以次第為氏 陸羽不知所生或
言有僧得之水濱畜之既長以易自筮得蹇之漸曰鴻漸
於陸其羽可用為儀遂以陸為氏羽為名而字以鴻漸
以字而訛

周封高陽之後於邾後為楚所滅子孫乃去邑而氏朱

周武王子邶叔子孫以國為氏其後去邑而氏于

東暫本疏廣之後曾祖避難去足為東民儀本姓氏

孔融嘲之曰氏字民無上可改為民徐衆評曰古之建

姓或以所生或以官號或以祖今離析文字橫生忌諱

是誣祖也吳志東據避仇改為棘文潞公本姓敬其曾

大父避石晉高祖諱更姓文至唐復姓敬入宋其大父

避翼祖諱又更姓文初敬氏避諱各用其一偏或為文

氏或為苟氏然敬字從著音棘非苟也從文非文也俱非

其一偏也

聞見後錄

以聲而訛

蔡伯喈作郭林宗碑曰其先出自周王季遷國命氏或謂之郭即其後也 魏初莫護跋率部落入居西遼時

燕代多冠步搖冠諸部因謂之步搖後音訛為慕容且以為氏

前燕錄

嵇康本奚氏後奚易而為嵇 唐辛替否

本夏啓封支子於革革辛聲相近遂為辛氏

本傳注

因事而改

車千秋本齊田氏千秋以年老得乘小車出入省中時人謂之車丞相子孫因以為氏 賀姓本齊之公族慶封之後漢侍中慶純避安帝諱改為賀氏 唐源乾曜本禿髮僊檀之子賀入後魏魏太祖謂之曰與卿同源氏遂以為氏乾曜蓋其後也傳唐席豫席出安定其先姓籍避項羽諱改姓席氏

更易姓名 見後姓名門

冒姓不一

漢灌孟本張氏後為灌嬰舍人冒姓灌氏 衛青父鄭

季給事陽信公主家奴與衛媼通生青故冒姓衛 婁

敬勸高祖都關中賜姓劉 夏侯嬰為滕公隨母養外

家因姓孫氏 鄭注本姓魚冒為鄭故當時號魚鄭及

用事人號為水族 員半千其先本彭城劉氏十世祖

凝之仕宋及齊受禪奔元魏自比伍員因姓員氏 李

元亮本姓安氏少為駱奉先養息冒姓駱氏 李勣本

姓徐氏後賜姓李封英國公 李抱玉本姓安名重璋

元宗以其戰河西有功賜姓李改名抱玉 五代劉知遠其先沙陀部人冒姓劉氏 石敬瑭其父臬捩雞本出於西夷其姓石氏不知其始

作氏族志

唐太宗詔高士廉與谷文本等賡天下譜牒詳考史傳作氏族志

號肉譜

李守素為倉曹叅軍通姓氏學號肉譜虞世南與論人

物歎曰肉譜定可畏許敬宗曰此名豈雅目耶世南曰
昔任彥昇通經時稱五經笥今以倉曹為人物志可乎

為世譜

歐陽文忠公蘇明允各為世譜文忠依漢年表明允以
禮大宗小宗為次雖例不同然皆足以考其世次余切
恠文忠所謂不知姓之所自而昧昭穆之叙則禽獸不
若也其譏誚世之人可謂至矣然歐陽氏得姓凡幾年
其間文學之士蓋亦多矣文忠始為之譜斯言恐未為

得也塵史

古今文集

雜著

論氏有九

凡氏之興九事賜氏於國齊魯宋衛也賜氏於謚戴武
宣穆也賜氏於號唐虞夏商也賜氏以官則若司寇司
馬賜氏以爵則若王孫公孫賜氏以字則若孟孫叔孫
賜氏以居則若東門西門三鳥五鹿以志賜也巫氏匠

陶以事賜也

潛夫論

姓氏更易

譜牒之不明也久矣自晉東渡五胡亂中原衣冠離散而致然也夫京房之先李姓也牛弘之先遼姓也疎之後乃為東民之後乃為氏閩人避王審之諱則沈氏去水而姓尤南中多危氏有惡其稱者或改為元如此之類甚多元魏據洛諸虜喜中原之姓而冒之者益衆則譜不可以不知也

塵史

姓氏不同

呂伯恭

三代之時曰姓者統其祖考之所自出者也百世而不變者也曰氏者別其子孫之所自分者也數世而一變者也天子建德因生以賜姓其得姓雖一而子孫別而為氏者不勝其多焉有以王父之字為氏者矣有以先世之謚為氏者矣有以所居之官為氏者矣有以始封之邑為氏者矣支分派別千塗萬轍初若參錯紛亂而難考及徐而視之有綱有條猶指諸掌焉孟仲季臧東

門子叔同出於魯也游國豐印公父伯張同出於鄭也
向華蕩樂鱗魚仲老同出於宋也樂高崔國叔仲東郭
同出於齊也尋其流可以知其源尋其葉可以知其根
抑何易耶自秦漢以來氏族之制出於上之所賜下之
所更者絕無而僅有至於世守一氏傳千餘年而不變
者天下皆是也其變非若古之屢其列非若古之多可
謂簡而易知者矣然人罕有能辨氏族之源者王之氏
一也吾不知出於元城之王耶宜春之王耶邛城之王

耶劉之氏一也吾不知出於陶唐之劉耶奉春之劉耶
元海之劉耶其能明辨而不惑者鮮矣氏之馬者未必
能辨其為馬服之馬及馬矢之馬也氏之石者未必能
辨其為周衛之石及後趙之石也古之氏族繁而知之
者反多今之氏族簡而知之者反少盖由譜牒之明與
廢而已以是知譜牒之學不可不講也

分別姓氏

問姓氏如何分別曰姓是大總腦處氏是後來次第分

別處如魯本姬姓其後有孟氏季氏同為姬姓而氏有不同某嘗言天子因生以賜姓諸侯以字為諡因為族切恐謚本氏字先儒隨他錯處解將去義理不通且如舜生于嬀汭武王遂賜陳胡公滿為嬀姓此即因生以賜姓也如鄭之國氏本子國之後駟氏本子駟之後如此之類所謂以字為氏因以為族也

朱語錄

古今事文類聚後集卷一

欽定四庫全書

古今事文類聚後集卷二

宋 祝穆 撰

人倫部

姓名

姓名偶同
命名

更易姓名
命字

摩書要語姓所同也名所獨也盡心問其姓名俛而不

答

坡文

命名子生三月妻以子見于父父執子之右手咳而名

之內則君子已孤不更名禮曲

命字男子二十冠而字禮曲冠而字之敬其名也姓郊特冠

禮祝辭曰禮儀既備令月吉日昭告爾字字曰某父爰

字孔嘉髦士故宜宜之于嘏永言保之禮儀

詩句功曹上其言是日當登名韓兒童誦君實走卒知

司馬坡問之不肯道姓名杜不通姓氏麓豪甚杜南宮

起草舊連名韓故人漸達無消息古寺空來看姓名坡

我名公字偶相同荆公

古今事實

父母史無姓名

前漢去古未遠風俗質略故太上皇無名母媼無姓然
唐宰相世系表叙劉氏所出云晉士會適秦歸晉有子
留于秦自為劉氏秦滅魏徙大梁生清徙沛生仁號豐
公生瑞字執嘉生四子伯仲邦交邦漢高祖也高祖之
父漢史不載而其名唐史乃載之亦可一笑

演繁露

欲逃姓名

後漢韓康伯字伯休賣藥長安市時有女子從康買藥
康守價不移女子怒曰公是韓伯休耶乃不二價乎康
歎曰我本欲逃名今小女子皆知我何用藥為

不告姓名

李白失意遊華山縣宰方開門決事白乘醉跨驢過門
宰怒不知太白也引至庭下曰汝何人輒敢無禮白乞
供狀無姓名曰曾用龍巾拭吐御手調羹力士脫靴貴
妃捧硯天子殿前尚容吾走馬華陰縣裡不得我騎驢

撫遺錄

草木知名

德宗徙張萬福為濠州刺史曰先帝改爾名正者所以褒也朕謂江淮草木亦知爾威名因復賜舊名

虜問姓名

裴度討吳元濟平淮西以功封晉國公名震四夷使外國者其君長必問度年幾狀貌孰似本傳

名覆金甌

玄宗每命相皆先書其名一日書琳等名覆以金甌會太子入帝問之太子曰非崔琳盧從愿乎帝曰然

書名探丸

宣宗命相必探中外有人望者三兩人姓名撚之成丸致香案上以物覆之焚香探丸始命草麻

探名瓶中

五代盧文紀形貌魁偉廢帝竒之及帝立欲擇相悉書清望官姓名內琉璃瓶中夜焚香告天以筭探之首得

文紀欣然相焉

惡其姓桑

桑維翰舉進士主司惡其姓桑喪同音人勸勿舉進士
維翰著日出扶桑賦以見志又鑄鐵硯曰硯敝則改而
他仕卒及第

知敬司馬

遼人夏人遣使入朝與吾使至北中者彼必問公起居
及為相遼人勅其邊吏曰中國相司馬謹毋生事開邊

隙

婦孺知名

司馬公上疏論新法利害曰後當如是行之十餘年無一不如公言者天下傳誦以公為真宰相雖田父野老皆號司馬公而婦人孺子知其為君實也

行狀

名聞宮禁

王樞密疇之夫人梅鼎臣之女也景德初梅夫人入謝慈壽宮太后問夫人誰家子對曰梅鼎臣女太后笑曰

是聖俞家乎由是始知聖俞名聞宮禁也

歸田錄

醉人不識

東坡云自得罪以來深自閉塞扁舟草屨放浪山水間與漁樵雜處往往為醉人所推罵輒自喜漸不為人識平生親友無一字見及有書與之亦不答自幸庶幾免矣

回李端叔書

兩曾參

以下係姓名偶同

有與曾子同姓名者而殺人人告曾子之母母曰吾子

不殺人織自若有頃焉人又曰曾參殺人其母尚織自若也頃之又一人告之曰曾參殺人其母懼投杼踰牆而走

戰國策

兩毛遂

野人毛遂墜井而死客以告平原君平原君曰嗟乎天喪予矣既而知非真毛遂

西京雜記

兩子夏

杜欽字子夏少好經書家富而目偏盲茂陵杜鄴與欽

同姓字俱以材能稱京師故衣冠謂欽為盲子夏以相別欽惡以疾見詆乃為小冠高廣財二寸由是京師更謂欽為小冠杜子夏而鄴為大冠杜子夏云

本傳

兩孟公

陳遵字孟公時列侯有與遵同姓字者每至人聞曰孟公坐中莫不震動既至而非因號其人曰陳驚坐云

兩韓翊

韓翊唐德宗時制誥缺人上批曰與韓翊時有與翊同

姓名者為江淮刺史所司具二人同進上復批曰春城
無處不飛花寒食東風御柳斜與此韓翃

二人同名

顧雍字元歎蔡伯喈異之謂曰卿必成名今以吾名與
卿故雍與伯喈同名 後魏游肇為廷尉時尚書令高
肇宣武之舅以肇名與已同欲令改易肇以孝文所賜
守正不許高甚銜之 往時學士入劄子不著姓但云
學士臣某先朝盛度丁度並為學士遂著姓以別之其

後遂皆著姓

歸田錄

子名類父

杜相鴻漸之父名鵬舉父子而似兄弟之名盖有由也鵬舉嘗夢有所之見一大碑云是宰相碑已作者金填其字未作者刊名於柱上因問有杜家兒否曰有任自看之記得柱下有鳥偏旁曳脚而忘其字乃名子為鴻漸而謂之曰汝不為相即汝子名字當鳥旁而曳脚也名字且前定况官與壽乎

名同古帝

德宗使人諭陸贄曰苗胤父晉卿往年攝政有不臣之言諸子皆與古帝王同名今不欲明行斥逐兄弟各宜降外官贄奏曰凡有譖愬之輩多非信實之言

真文忠德秀大學衍義云趙堯李舜未聞為逆於當時王莽曹操不假襲名於前代而譖者以此誣之可謂寃矣使無宣公庸得免乎宋仁宗時宋郊以名儒進用有讒之者曰姓符國號名應郊天郊

不自安改名曰庠然仁宗未嘗疑之而不命之相也欲聖譏說者其必以仁宗為法

改名作相

以下係更易姓名

范睢事魏中大夫須賈賈為魏昭王使於齊齊襄王聞睢辯口乃使人賜金十斤及牛酒睢辭謝不受賈聞之大怒以為睢持魏國陰事告齊故得此饋既歸以告魏相魏齊齊大怒使舍人笞擊睢折脅搯齒睢佯死即卷以簣置廁中賓客飲者醉便溺睢及得出伏匿更名姓

曰張祿既相秦魏謂秦相張祿而不知其為范雎也秦東伐韓將及魏魏使須賈求成於秦雎聞之微行敝衣間步之邨見賈賈驚曰范叔固無恙乎曰臣為人傭賃賈哀之留坐與飲更取一綈袍賜之因問曰秦相張君公知之乎雎曰主人翁習知之唯雎得謁願為君借大車駟馬辭歸取大車駟馬為賈御之入相府雎先入賈待之良久問門下曰范叔不出何也門下曰此吾相張君何范叔也賈大驚自知見賣乃肉袒膝行謝罪雎曰

爾罪有三所以得無死者以綈袍戀戀尚有故人之意
因盡請諸侯使與坐堂上飲食甚設而坐須賈於堂下
置莖豆其側令兩黥徒夾而食之數曰為我告魏王急
持魏齊頭來不然者我且屠大梁

更名去位

范蠡事越王竟滅吳雪會稽之恥稱大將軍以為大名
之下難居乃裝其輕寶與其徒屬浮海出齊變姓名自
謂鴟夷子皮耕於海畔居無幾置產數千萬齊人聞其

賢以為相蠱喟然曰居家則致千金居官則致卿相此布衣之極也久受尊名不祥乃歸相印盡散其財以與知友懷其重寶間行以去止於陶以為天下之中可治生自號陶朱公

更生改名

劉向本名更生恭顯等誣譖堪猛更生傷之乃著疾讒摘要後更名向

既貴歸姓

范文正公二歲而孤隨母改適山長朱氏遂冒姓朱後
歸姓范

以甲乙名 以下係命名

殷家質直故以生日名子尚書太甲帝乙武丁是也不
以子丑名者何也曰甲乙者幹也子丑者枝也幹者本
本實故以甲乙為名也 白虎通

以尼丘名

叔梁紇與顏氏女禱於尼丘生孔子孔子生而首上圩

頂故名丘字仲尼

史

以鯉名

伯魚之生適有饋孔子魚者喜以為瑞故名鯉

以柳樹名

展禽之家有柳樹身行惠德故號曰柳下惠

淮南子

以同物名

威六年九月子同生

丁卯年

以太子生之禮舉之接以太

牢卜士負之士妻食之公與文姜宗婦命之公問名於

申繻對曰名有五有信有義有象有假有類以名生為

信

若成季生而有文在手遂命之為友以德命為義若唐叔虞生而有文在手曰虞遂名虞

王名昌武

以類命為象

若孔子首象尼山遂名

取於物為假若伯

人饋魚

取於父為類

若子同生與父同物

不以國不以官不以山

川不以隱疾不以畜牲不以器幣周人以諱事神名終

將諱之故以國則廢名以官則廢職以山川則廢主以

畜牲則廢祀以器幣則廢禮晉以僖侯廢司徒僖侯名

為中

宋以武公廢司空

武公名司空廢為司城

先君獻武廢二山

二山具教也魯獻公名具武公名敖更以其鄉名山是以大物不可以命公曰是

其生也與吾同物命之曰同

左傳

後漢鄭玄孫小同以丁

卯日生而玄以丁卯歲生故名小同

後漢書

以仇師名

晉穆侯伐條之役生太子命之曰仇其弟以千畝之戰生命之曰成師師服曰異哉君之名子也夫名以制義義以成禮易則兆亂君命太子曰仇弟曰成師始兆亂矣兄其替乎

以於菟名

見虎門

以蘭名

見蘭門

以慕賢名

司馬長卿父母愛之不欲稱斥名犬子慕蘭相如之為人遂改名相如

以門閭名

晉賈充字公閭父遠晚始生充言後當有充閭之慶故以命名字焉

以名為戲

梁何敬容為尚書令淺於學術拙於草隸署名敬字大作苟小為文容字大為父小為口陸倕見而戲之曰公家苟既奇大父亦不小敬容不能答

字則未聞

以下係命字

孟子名軻字則未聞或曰字子輿一字子車

以臺命字

趙岐字邠卿初名嘉其祖為御史岐生於御史臺因

字臺卿

諱犯父字

魏司馬朗字伯達九歲客有道其父字者朗曰慢人親者不敬其親者也客謝之

魏常林事同見年齒門

以戲命字

阮孚母祖姑家胡婢也父咸通之生孚咸遺姑書曰不意今日遂生胡兒姑答曰靈光殿賦云胡人遙集於上楹便可以遙集為字咸從之

古今文集

雜著

姓氏諸說

見前姓氏門

名號花書

唐人初未有押字但草書其名以為私記故號花書韋陟五雲體是也余見唐誥書名未見一楷字今人押字或多押名猶是此意王荊公押石字初橫一畫左引脚中為一圈公性急圈多不圓徃徃窩匾而橫畫又多帶

過嘗有密譏公押反字者公知之加意作圈一日畫楊
蟠差遣勅作圈復不圓乃以濃墨塗去旁別作一圈蓋

欲矯言者楊氏至今藏此勅

石林燕語

名同行異

陸龜蒙

邵侯姜女之生子也始棄之命之曰棄宋芮司徒之生

女也始棄之亦命之曰棄邵為稷官蒸民賴之宋棄姜

而生佐幾移宋祚名之同也奚傷舜重瞳子項羽亦重

瞳子形之類也奚病擇其道可耳

雜記

慕古賢名

顏之推

昔司馬長卿慕藺相如故名相如顧元歎慕蔡邕故名
雍而後漢有朱張字孫卿許暹字顏回梁世有庾晏嬰
祖孫登連古人姓為名字鄙才也昔文饒不忍罵奴為
畜產今世愚人遂以相戲或有指名為豚犢者有識旁
觀猶欲掩耳況當之者乎

家訓

名本而字末

君之於臣先生之與其門人名之可也至於同官之於

僚黨同姓之於昆弟同門之於朋友可以稱其字而不
可斥其名故公羊傳曰名不如字者非謂其人之名不
如其字尊乃謂為人所字則近乎見尊為人所名則近
乎見卑也古之君子之名子也必以信義而擇淑令所
以祥其名也不以官職所以殊其名也不以畜幣所以
重其名也不以隱疾所以顯其名也遍告內外所以昭
其名也書而藏之所以寶其名也賤者避焉所以貴其
名也冠而有字所以尊其名也名成乎禮字依乎名名

字之本字名之末也為本故尊為末故卑尊故其禮詳卑故其事略且婦人無名故賤於丈夫野人無名故賤於學士名者已之所以承尊尊者之所以命已字則已之所以接卑卑者之所以稱已未有用之於尊而為卑用之於卑而為尊者也

太平御覽
載秦記

雜著 係命名

二子名說

蘇明允

輪輻蓋軫皆有職乎車而軾獨若無所為者雖然去軾

吾未見其為完車也軾乎吾知爾之不外飾也天子之車莫不由轍而言車之功轍不與焉雖然車仆馬斃而患不及轍是轍者禍福之間也轍乎吾知其免也矣

章子林子名說

陳君舉

古人之名惟所遇焉斯取之矣非擇也商以上迭以甲乙命蓋雜紊而無當至於周諱行而名始尊然曰顛曰天非美辭也而取之以名春秋之世猶不厚乎名衛有石惡晉有驥戾齊有陳逆楚有屈蕩周有史佚夫數辭

者皆人之愧焉而至不美者也而取之以名展禽解狐
若是者則有取乎物之賤者以自名下而漢晉士方以
名相高唐以來士無陋名名美而人才日卑嗟夫專於
其內而不張於其外急乎其外而不勵乎其內古今人
之異也宜哉而二子之請甚矣其非古人之意也名不
若人汲汲乎求治之心不若人則姑徐徐而已耳盍亦
反其本乎雖然二子以自治之請來余又何可辭之於是
名章子曰用中林子曰毅章子愿而固林子弱而浮以

其名之得微中乎心夫二子由是焉而反之斯名也其猶二子之益友乎里名勝母曾參不入彼里名豈足以挽吾孝哉而君子亟去焉亦合內外之道也然則二子之請於余余不吝於二子雖非古人之意是亦古人之意而已矣

朱甥子臧名說

陳君舉

吾兄有朱甥子臧遇予持尺紙拱而問名焉予曰爾何若名之問也人能美名名不能美人淑爾身雖陋爾名

人不爾議也爾身之不淑假而以丘軻自號焉天下莫
之予矣是故古之為名姑用是焉別稱道而已矣賢否
不係也爾何名之問也雖然童子而知問名可嘉也凡
人之善自一念而為也故患莫大於無慕學莫強於自
與爾知重而名則必知重而身矣噫是念足以為善矣
吾故名爾曰子臧而猶未爾字越十年吾將爾考焉而
不負吾名字爾未晚也

古詩

命子

前段見宗族門

陶淵明

卜云嘉日占亦良時名汝曰儼字汝求思溫恭朝夕念
茲在茲尚想孔伋庶其企而厲夜生子遽而求火凡百
有心奚待於我既見其生實欲其可人亦有言斯情無
假日居月諸漸免於孩福不虛至禍亦易來夙興夜寐
願爾斯才爾之不才亦已焉哉

詩話

同榜改名

宋郊字伯庠在翰林有指公姓名傳以他說者公因請
更名嘗移書葉道卿清臣目為同年葉荅云清臣宋郊
榜第六人登第徧閱小錄無宋庠者不知何許人公答
詩云紙尾勤勤問姓名禁林依舊玷華纓莫驚書錄題
臣向便是當年劉更生

雜著係命字

字可為氏

古者名以正體字以表德名終則諱之字乃可以為孫

氏孔子弟子記事者皆稱仲尼呂后徵時嘗字高祖為
季至漢爰種字其叔父曰絲王丹與侯霸子語字霸為
君房江南至今不諱字

古不諱字

或問子思稱夫子為仲尼先生曰古人未嘗諱其字程
先生云予年十四五從周茂叔本朝先輩尚如此伊川
亦嘗呼明道表德如唐人尚不諱名杜甫詩云白也詩
無敵李白詩云飯顆山頭逢杜甫

江南祝有道字序

黃魯直

黔川祝林宗因知命問字於涪翁涪翁字之曰有道而告之曰漢東國士惟郭有道尚友千載雖遠可到廓爾胷次以觀羣躁

張說子難字說

黃魯直

南陽張說子難嘗以名字求余為序余辭以不能而求不已子難溫成后家門戶方煒煒然觀子難折節僚友間如寒士不可謂不智予嘗以人所不能甘之語犯之

而子難不怒也不可謂不强強且智是將升君子之堂孰能禦之則告之曰君子易事而難說聖人語也彼可以怒而去可以拊而來皆凡民耳維君子於此道飲則列於樽彝食則形於籩豆坐則伏於几立則垂於紳升車則鸞和與之言張樂則鐘鼓為之說顛倒風雨而守此道者猶晏然彼方脅肩求入獻笑不情必且莫逃於氷鑑之中雖然聾者妙於見秋毫之末而瞽者聽微惟絕利一源耳不去害道者無自而入道寧成為少吏必

陵其長吏為人上操下如東濕王肅方於事上而好下
佞已在已則昧在人則昭此亦學士大夫之同病哉君
子之待人也或不屑之教誨細人之司巖使我化而與
之歸故神兵經物而不疾甘鼠齧人而不知寇在外而
關壯弱可不戒哉

稱呼

羣書要語國君不名卿老世婦大夫不名世臣姪娣士
不名家相長妾君大夫之子不敢自稱曰余小子大夫

士之子不敢自稱曰嗣子某不敢與世子同名

曲禮

自稱

曰老夫

曲禮

君子疾沒世而名不稱焉

語

古者稱師曰先

生

韋昭辨名

府君夫人漢人碑已有之只是尊神之辭府君

如官府之君或謂之明府今人亦謂父為家府

朱語錄

詩句甚愧丈人厚

杜

愁吟獨老翁

杜

時呼張丈喚殷兄

白

晚歲當為田舍翁

柳

今為紅藥主人翁

歐

古今事實

天子稱朕

始皇已并天下李斯等議曰有天皇有地皇有秦皇秦
皇最貴臣等昧死上尊號王為秦皇命為制令為詔天子
自稱曰朕蔡邕注曰朕我也古者上下共稱至秦然後
天子獨以為稱

稱天子曰陛下

李斯等議曰今陛下興義兵誅殘賊蔡邕注陛階也天
子必有近臣立於階側以戒不虞謂陛下者群臣與天
子言不敢指斥故呼在陛下者與之言因卑達尊之意

稱天子曰官家

李侍讀仲容善飲號李萬回真宗飲量無敵飲則詔公
一夕上命巨觥仲容曰告官家免巨觥上因問何故謂
天子為官家仲容舉蔣濟萬機論曰五帝官天下三王
家天下兼三五之德故曰官家上大喜曰所謂君臣千
載遇李曰惟有忠孝一生心

湘山野錄

自稱牛馬走

司馬遷上任少卿書自稱太史公牛馬走

推尊曰公

孔融告高密縣為鄭玄特立一鄉曰鄭君好學實懷明德昔太史公廷尉于公謁者僕射鄧公皆漢之名臣又四皓有東園公夏黃公潛光隱耀世嘉其高皆悉稱公然則公者仁德之正號不必三事大夫也今鄭君鄉宜曰鄭公鄉

呼鼠子

魏文帝詔曰此鼠子自知不能保爾許地也

孫權傳注

婦人卿壻

王安豐婦卿安豐安豐曰婦人卿壻禮為不敬後勿復
爾婦曰親愛卿故卿卿我不卿卿誰復卿卿

同儕稱卿

庾敳字子嵩王衍不與敳交敳卿之不置衍曰君不得
為耳敳曰卿自君我我自卿卿我自卿卿我自卿卿自用
卿家法衍甚奇之

雜錄

呼小子

王爽嘗與會稽王道子飲道子醉呼爽為小子爽曰亡祖長史與簡文皇帝為布衣交亡姑亡姊伉儷二宮何小子之有

自稱僕

宋劉凝之隱居南郡臨川王義慶鎮江陵遣使存問答書曰頓首稱僕不為百姓禮人或譏之凝之曰未聞巢許稱臣堯舜時戴顓與衡陽王義季書亦稱僕

稱公輕脫

宋顏延之傳何偃路中遙呼延之曰顏公延之以其輕
脫答曰身非三公之公又非田舍之公又非君家阿公
何以見呼為公偃慙而退

貴不可卿

齊陸慧曉未嘗卿士大夫或問之答曰貴人不可卿人
生何容立輕重於懷抱

稱第行

北齊張稷為豫章王嶷主簿與劉繪俱見禮接未嘗呼

名呼為劉四張五劉逖為開府參軍文宣崩文士並作挽歌楊愔擇之員外郎盧思道用八首逖用二首中書侍郎李愔戲逖曰盧八問訊劉二逖銜之後中書侍郎李愔獻賦逖摘其文奏曰毀謗先朝武成怒大加鞭扑逖喜復前憾曰高撻兩下執鞭一百何如呼劉二時

稱張底

崔湜為中書令張嘉貞為舍人湜輕之嘗呼為張底後議事皆出人右湜驚曰張底乃我輩一般人此終是其

坐處

隋唐
嘉話

天子不名

李吉甫帝尊任之官而不名郭子儀代宗不名呼為大
臣陸贄入翰林年尚少以才幸天子輩行呼而不名權
德輿作贄集序有時燕語不以公卿指名但呼陸九

天下不名

張九齡開元後天下稱曰曲江公而不名李德裕天下
士歸重不敢有所斥稱贄皇公而不名元德秀天下重

其行謂之元魯山而不名

歇後鄭五

鄭縈本善詩其語多俳諧故使落調世共號鄭五歇後體昭宗署班簿曰可同平章事時省吏走其家上謁縈笑曰諸君誤矣人皆不識字宰相不及我吏言不妄俄聞制詔下搔首曰歇後鄭五作宰相事可知矣

古今文集

雜著

稱家父家姑

顏之推

昔侯霸之子孫稱其祖父曰家公陳思王稱其父曰家父母曰家母潘尼稱其祖曰家祖古人之所行今人之所笑也今南北風俗言其祖及二親無云家者田里猥人方有此言耳凡與人言言已世父以次第稱之不云家者以尊於父不敢家也凡言姑姊妹女子已嫁則以夫氏稱之在室則以次第稱之言禮成他族不得云家也子孫不得稱家者輕略之也蔡邕書集呼其姑女為

家姑家妹班固書集亦云家孫今並不行也凡與人言稱彼祖父母世父母父母及長姑皆加尊字自叔父母以下則加賢字尊卑之差也王羲之書稱彼之母與自稱已母同不云尊字今所非也

家訓

自釋

元結

河南元氏望也結子予名也次山結字也世業載國史世系在家牒少居商餘山著元子十篇故以元子為稱天下兵興逃亂入猗玗洞始稱猗玗子後家瀼濱乃自

稱浪士及有官人以為浪者亦漫為官乎呼漫郎既客
樊上漫遂顯樊左右皆漁者少長相戲更曰聲叟彼誚
以聲者為其不相從聽不相鈎加帶簦簪而盡船獨聲
齟而揮車酒徒得此又曰公之漫其猶聲乎公守著作
不帶簦簪乎入漫浪於人間得非聲齟乎公漫久矣可
以漫為叟於戲吾不從聽於時俗不鈎加於當世誰是
聲者於欲從之彼聲叟不慙帶乎簦簪吾又安能薄乎
著作彼聲叟不羞聲齟於隣里吾又安能慙漫浪於人

間取而尤汝也醉人議當以漫叟為稱直荒浪其情性
誕漫其所為使人知無所存有無所將待乃為語曰能
帶笈簞全獨而保生能學聲齟保宗而全家聲也如此
漫乎非耶

稱公非一義

柳宗元

天子之三公稱公王者之後稱公諸侯之入為王卿士
亦曰公有土封其臣稱之曰公尊其道而師之稱曰公
楚之僭凡為縣者皆曰公古之人通謂年之長老曰公

故言三公若周公召公王者之後若宋公為王卿士若
衛武公虢文公鄭桓公其臣稱之則列國皆然師之尊
若太公楚之為縣者若葉公白公年之長老若毛公申
公涪公

稱閣下執事

古者三公開閣而郡守比古諸侯亦有閣故有閣下之
稱前輩與大官書多呼執事與足下劉子玄與宰相書
曰足下韓退之與張僕射書曰執事即其例也惟執事

則指左右之人尊卑皆可通稱又自卑達尊例云座前
尤非也閣下降殿下一等座前降几前一等豈可僭用
哉

封母加太字

故事臣僚封贈母祖母不問生歿並加太字曰太夫人
太君政和間待制劉安上建言太者事生之尊稱也封
母而別之所以致別于其婦既歿並祭于夫若加之尊
稱則是以尊臨其夫也以尊臨夫于名義疑若未正自

是始詔命婦追封並除去太字逮紹興新書復仍舊制
晏尚書敦復領吏部援劉待制言申明且引漢文帝紀
七年冬十月令列侯太夫人夫人無得擅徵補注謂列
侯之妻稱夫人列侯死子復為列侯仍得稱太夫人蓋
此義也於是追封始不復稱太云按帝者之祖稱太皇
太后稱母皇太后既升祔止稱皇后正此比也

稱外姓親

近世故家惟晁氏因以道申戒子弟皆有法度群居相

呼外姓尊長必曰某姓第幾叔若是諸姑尊姑之夫必
曰某姓姑夫某姓尊姑夫未嘗敢呼字也其言父黨交
遊必曰某姓幾丈亦未嘗敢呼字也當時故家舊族皆
不能若是

後世分等第

洪景盧

東坡云凡人相與號呼者貴之則曰公賢之則曰君其
下則爾汝之雖王公之貴天下貌畏而心不服則進而
君公退而爾汝者多矣予謂此論特後世之俗如是耳

古之人心口一致事從其真雖君臣父子之間出口而

言曾不顧忌觀詩書所載可知矣

容齋
隨筆

跋許將狀元與蔣穎叔樞密帖

洪景廬

前輩與執政書亦猶字之今人年未三十一舉於禮部
則鄉先生不敢字之且曰張丈李丈矣嗚呼其益薄矣
夫

贈梅生說

陳君舉

古者士相號曰子若生子若生非所以賤薄人之稱也能以其姓配焉而著者蓋鮮矣商而上惟箕子以子著周衰著莫如孔子孔子之徒則顏子曾子有子以子著餘未有聞焉春秋之所貴者子之如季子高子是已詩之所美者亦子之若彼妹者子是也太史公列傳得子稱者老子孟子荀子樗里子數人而已劉氏七略以子稱者七十有六而獨荀子楊子著自唐韓柳今天下未有盡子之也至於生著焉者蓋鮮魯有兩生楚有韓生

皆以生著者也漢之世則酈生賈生伏生歐陽生轅生
高堂生胡毋生而蕭望之號東海蕭生然不以生著天
下豈賤薄人之辭哉世之澆士甚於相諂下之所號乎
上者匪君若公上之所號乎下者亦匪君若公以予若
生號人人則以怒予悲之今梅生以技遊不藉乎四民
而操日者之說以行乎世世之喜福而懼禍幸天而憐
人者則宗生而予非宗生之說者也以予疾世之諂而
又非宗生之說者則以生而號焉亦奚不足者而亦怒

以不受噫予何愛於君若公而不以悅生哉予而愛夫
君若公而不以悅生者宜亦有所感焉者矣生謂斯何
遂以為梅生贈

詩話

閤人請官稱

呂某公歸老於洛嘗遊龍門還閤者執筆歷請官稱公
題以詩云思山乘興看山回烏帽綸巾入帝臺閤吏不
須詢姓字也曾三到鳳池來

後山
詩話

稱蘇二

東坡解纜赴黃州山谷嘗避暑城西李氏園題兩詩於
壁其一章云荷舞竹風宜永日冰壺涼簟不能迴題詩
未有驚人句會喚謫仙蘇二來秦少游言於東坡曰以
先生為蘇二大似相薄

志林

稱黃九

山谷有茶詩押腸字韻和者以數四山谷最後有曲几
團蒲聽煮湯煎成車聲遶羊腸之句東坡見之云黃九


恁地怎得不窮故無咎復和云車聲出鼎細九盤如此

佳句誰能識

志林

稱歐九

見強記門



古今事文類聚後集卷二